

ARUBA JAZZ AND LATIN MUSIC FESTIVAL

FREDDIE JACKSON A GARA PUBLICO CU SOUL



ORANJESTAD(AAN): Diaviera anochi tur cos tabata mustrand cu Freddie Jackson lo tin un presentacion tranquil riba escenario sin cu fotografonan ta flash luz continuamente den su cara, sin cu publico ta aglomera dilanti su audiencia.

Pero for di momento cu el a dal su "Rock me tonight" e tranquilidad ey a kibra, ya cu na decenas e publico a basha bin dilanti pa para dilanti escenario y tin di nan cu a haci intencionan pa subi riba escenario, mientras cu otronan a logra pa un rato, pa ta cerca di nan artista preferi.

Freddie Jackson a pone publico bira loco. Hunto cu su agrupacion y coro, el a presenta un concierto di soul music y baladanan popular manera "Do me again", "Love me down", "You are my lady", "Tasty love", "Jam tonight", "Nice 'n slow" cu a pone bira un di e poco artistanan di grabacion contemporaneo cu a yega, mira y conquista Broadway.

Freddie Jackson tabata acompaña pa un coro formidable cu entonacion varia masha bunita, y un agrupacion musical excelente.

Cu cada cancion, e tabata duna e toque special di Freddie Jackson, cu su interpretacion suave, yen di calor y sensual.

Su estilo distintivo y expresivo y su movecionnan ritmico riba cada melodia a agrega e toque di exito di e anochi.

TATTOO A SORPRENDE DEN FESTIVAL



ORANJESTAD(AAN): Ora cu tur hende a kere cu Aruba Super All Stars Band lo habri e anochi cu un pieza musical cayente pa crea ambiente, a resulta cu Tattoo tabata tin un sorpresa scondi.

Manera Scorpio a anuncia Tattoo, esaki a bin dilanti, cuminsa cu un "rap" cu publico acompañando e cu batimento di man, y pa medio di su "rap" a introduci un pa un di e tocadornan kendenan a caya den tocandonan respectivo instrumento, pa asina forma un introduccion ritmico cu a cay masha na agrado di publico, habriendo show di Aruba Super All Stars Band.

Claudius Philips te ainda ta e unico cantante Arubano cu por duna un show di realce na e festival aki, pero Tattoo a demostra diasabra anochi cu e ta desarollando su mes den bon direccion, y diasabra anochi cu respaldo di e banda y di Claudius, por poco a "steal the show".

Masha orgulloso el a keda despues di e acogida cu el a ricibi, no solamente pa su animacion, pero tambe pa su baile y voz.

Tattoo a habri cu e composicion di Lucio Rivan-deneira (director di e orquesta y saxophonista) Mi Delicia", cual

TANIA MARIA: UN PERLA ARTISTICO

ORANJESTAD(AAN): Tur esnan cu den pasado a mira actuacion di Tania Maria, diaviera ultimo a expresa nan gran admiracion pa e "perla artistico" di Brasil cu ta residencia na New York.

Tania Maria, pianista, cantautor y productora, diaviera anochi a duna e publico den Elias Mansur Ballpark, un concierto cu pa hopi aña nan lo no lubida. Tania a resulta di ta un di e artistanan di jazz e aña aki cu a conquista e publico for di cuminsamento di su actuacion, y a keda mantene contacto cu su audiencia, envolviendo publico den su onomatopoeo of scatsinging, manera e ta ser yama na ingles, cu tur hende disfrutando un mundo.

Un di su cancionnan cu a cay masha na agrado ta "I can't get no satisfaction", den cual tambe su bahista Kip Green a duna un solo maravilloso.

Cu ritmo di samba combina cu jazz el a logra exito grandi tambe cu su cancion "I can't give you anything but love".

Na fin di su presentacion el a presenta un bosanova combina cu toquen di jazz, den cual su scatsinging y participacion di publico tabata un gozo.

"parumparum parum pa pa. Parararumparumparumpa". Tabata resona den henter Elias Mansur Ballpark.

Tania Maria a presenta un mescla di diferente estilo, cantando na piano, tocando y dirigiendo su agrupacion, trahando su salsa musical cu toquen di musica brasileño, filtra cu jazz, pop americano y hasta toquen fin di clasica.

Na final el a ricibi un ovacion grandisimo cu publico gritando na voz duro "Tania come back!" y a logra haya e artista grandi riba escenario pa un cancion extra di despedida bao di aplauso tremendo di su publico.

APLAUSO PA TRAHADORNAN

Den cuatro aña di Aruba Jazz and Latin Music Festival nunca a logra un control adecuado dilanti stage pa evita cu e publico ta bin aglomera dilanti di bishitantenan y publico sinta cu a paga cantidad di placa pa mira e shownan.

Diaviera y Diasabra anochi esaki a wordo logra, y tabata prome dos anochinan cu polis no tabata presente pa mantene orden.

E trahadornan Kelvin Augustin, Arnold Solognier y Maikel Wirth, diaviera anochi a haci un trabao excelente der esaki, caminda cu e publico sin wordo stroba pa fotografonan por a mira nan show di Tania Maria y prome parti di Freddie Jackson tranquil.

Tabata bunita pa mira con fotografonan ta haya oportunidad pa hay dilanti saca foto y regresa patras. Si nan keda mes dilanti sperando momento oportuno pa saca un bon shot, nan mester zak abao y no stroba ningun hende.

Tabata den cayente di show di Freddie Jackson den ultimo parti di anochi cu publico a "los laga bay". Aki si na decenas nan a basha bin dilanti te dilanti escenario pa anima nan cantante, y esaki si tabata momentonan cu e trahadornan no por a haci nada y a laga bay, ya cu esey ta "kick" di final di tur anochi di jazz.

Pabien na Kelvin, Maikel y Arnold pa nan bon trabao.

danza as baha sabroso manera awa di coco, manera e palabranan mes ta menciona.

Despues di esey e publico latino a ser deleita cu un guaracha adapta pa All Stars na salsa, y Tattoo, interpretando "Fiel enamorado" a move su publico.

Den e salsa aki, Eduardo Maya a duna un solo mahestral riba trompet, sigui pa solo di Victor Camacho riba piano, cu tambe a ricibi hopi aplauso, pa finalmente Tissy Vrolijk resona

su solo di trombone bao di un ovacion pa Aruba Super All Stars Band.

Tur e momento ey Tattoo a desaparece di escenario y a

bolbe bisti na indian pa termina su salsa y mes ora despues cu grito di publico dunando sosten resona su Indian.

Tattoo a acompaña Claudius Philips tambe den e combinacion di roadmarchnan interpretando su Slide & Duck, y a logra exito rotundo e anochi aki.

TELEFON DI DIARIO
22207 - 26747 - 32352
35023 - 35026

ARUBA JAZZ AND LATIN MUSIC FESTIVAL

CLAUDIUS PHILIPS RECONOCI COMO GRAN ARTISTA

ORANJESTAD(AAN): Varios periodista di exterior, tambe locutoran di emisoranan radial di New York y representantenan di Americas Black Forum a reconoce den Claudius Philips diasabra anochi un gran artista y di caliber internacional.

Locutor di e emisora WBLs a puntra despues pa haya tur informacion necesario riba Claudius pa e hiba pa empresarionan neyorquino.

Claudius Philips a habri su actuacion cu Aruba Super All Stars Band interpretando un cancion nobo componi pa e mes, titula "Welcome to the island" cual cancion indudablemente lo bira un exito dia cu e wordo graba.

Locual a duna un efecto masha bunita den e cancion ta momentonan cu "Echo" ta resona na final di palabranan di e cancion.

E ritmo tabata algo straño manera un combinacion di calypso cu roadmarch y salsa, pero despues a bin haya sa cu ta un ritmo nobo inventa pa Claudius cuaser yama Cal-sapo".

Ta trata di un ritmo sumamente agradabel pa sucha.

Despues di e ovacion cu Claudius Philips a ricibi pa su



entrada, el a manda publico den cielo cu e cancion balada "All by myself" cu a ser adapta pa su persona y cu un solo di Alto

Sax di Albi Navas y combinacion bunita di voznan di e coro.

Claudius Philips a interpreta seguidamente su Ki tin? Party.....demostrando un parti grandi di nos cultura musical durante carnaval y a yama tambe riba escenario Tattoo pa hunto cune interpreta Slide and Duck y despues Tattoo pidiendo Claudius pa cera cu e roadmarch Ki tin.

E publico a zwaai y balia riba e ritmo carnavalesco aki aplaudiendo y gritando na voz halto dunando nan aprobacion na e cantantenan.

Finalmente Claudius Philips a cera su actuacion di anochi cu e compisicion di Padu del Caribe, Despedida, adapta pa Claudius den 6/8 wals (jazz wals) dunando honor na e gran Arubano, compositor y pianista Padu del Caribe.

El a wordo canta na ingles y papiamentu cu e toque di jazz resonando masha bunita.

Claudius Philips sigur atrobe a demostra cu pa e festival aki, Aruba mester di dje ainda pa saca cara, pasobra lo dura poco prome cu haya otro pa tuma su lugar di showmanship Arubiano.

ARUBA SUPER ALL STARS BAND MASHA ELOGIA DIASABRA

ORANJESTAD(AAN): Pa di tres biaha den 4a ña All Stars Band di Aruba a haya oportunidad pa presenta den Aruba Jazz and Latin Music Festival y e aña aki di periodistanan di exterior, y otro bishitantenan, e musiconan mester a tende den conferencia di prensa y pafo riba tereno, pakico nan no a ser programa pa mey mey di programa.

Esaki tambe tabata locual PRIDE a tende Diahuebs anochi di bishitantenan.

Aruba Super All Stars Band a presenta hopi fuerte e aña aki cu un caliber musical halto comparable cu cualquier di e agrupacionnan latino cu sa presenta den e festival, y mescos cu PRIDE diahuebs anochi, mester a habri e show na un momento frieuw.

E musiconan di nos isla cu cantantenan Claudius Philips y Tootie, a duna e bishitantenan y localnan un anochi masha agradabel, ricibiendo ovacionnan grandi.

Aruba Super All Stars band a bini cu un repertorio internacional cu tabata mas facil pa e bishitantenan por a compronde.

Frank Granadillo no a forma parti e biaha aki, pero esey tabata como cu e ta na Hulanda, pero si el a arregla pa e banda ya cu e ta un miembro di All Stars.

Hildward tambe no a forma parti e aña aki, pero tur hende sa cu Hildward Croes ta den exterior cu 4-40 pero tambe ta miembro di All Stars.

Un persona cu tambe no a forma parti e biaha aki tabata Robert Jeand'or.

Robert aña pasa a canta den All Stars, pero e aña aki a duna e joven Tattoo un oportunidad pa demostra su mes, locual el a logra indudablemente.

A busca e aña aki como bahista un musico cu sentimento pa Jazz, soca, calypso y calsapo y den e caso aki esun mas adecuado a resulta Fan Ras cu tabata hopi bon acompaando Claudius den su "Despedida" y "All by myself".

Diasabra anochi DIARIO a conversa un rato cu Joy Kock kende a yega di forma parti di Comision di Jazz, riba motibo cu atrobe e banda di Aruba mester a habri anochi.

El a splica cu esey tabata un di e motibonan tambe cu el a sali di e comision pasobra nan no kier a duna musiconan di Aruba oportunidad pa toca y a ser nenga.

"Despues e comision di antes, a permiti pa nan por toca riba trailer cu nan a toca den carnaval, locual tabata un insulto grandi pa nos musiconan y mi a retira te dia di awe.

"Awor tin un comision cu mihor mira, muy particular Tim Werleman y cuater grupo local, Aruba Super All Stars, Pride, Aruba Art Ensemble uy Jazz Project 91 a forma parti e aña aki."

"Locual si mi ta lamenta y e periodistanan di afo a expresa esey tambe den e conferencia di prensa, ta cu bandanan di Aruba mester haya oportunidad pa demostra nan mes mey mey di show, y mi ta spera cu e comision lo tene cuenta cu esey otro aña. Den e forma nobo, e comision di e festival mester ricibi un felicitacion di mi parti", el a laga sa.

NANCY WILSON: POSTRE MUSICAL

ORANJESTAD(AAN): Un postre musical ta locual Nancy Wilson a duna su publico

diasabra anochi den Aruba Jazz and Latin Music Festival. Despues di e merienda di Aruba



Super All Stars Band, cu entrada di Tattoo, salada di Claudius y plato principal di Jazz Explosion cu Stanley Turrentine, Freddie Hubbard, y Joe Williams, Nancy Williams a termina e banqueta musical cu e postre di lo mas delicioso.

Belleza femenino combina cu un elegancia excepcional y cu un voz celestial tabata tin riba escenario cu Nancy Wilson cantando exitonan grandi manera "In the still of the night", "Guess who I saw today", y "The lady with a soul", entre otro cosechando aplauso na gran cantidad.

El a termina su show, cu publico na gritamento pa mas y pa e bolbe, y despues di bolbe riba escenario a deleita e publico cu algun di su exitonan di "ayera", y a demostra cu no ta pornada e ta ser considera como un di e Gran damanan di canto" na Merca.

Tanto Vikki Carr, Tania Maria y Nancy Wilson, e damanan invita e aña pa e festival, a demostra na publico nan caliber y pa kico nan ta di fama internacional y hasta mundial, oportunidadnan cu publico Arubano ta haya solamente durante e festival aki anualmente.

VARIOS ARTISTA A PROLONGA NAN ESTADIA NA ARUBA

ORANJESTAD(AAN): Pa e festival di jazz y musica latina di e aña aki, varios artista a prolonga nan estadia riba nos isla.

Den conversacionnan cu DIARIO a tene cu varios musico y artista, e tranquilidad cu nan a haya riba Aruba y e trato excelente cu tur hende a duna nan a pone cu nan a dicidi di keda Aruba poco mas pa descansa.

Vikki Carr por ehemplo tabata un cu a duna di conoce cu el a sinti su mes liber y tranquil y save paseando den lobby di hotel y den centronan comercial, sin cu ningun momento el a wordo molestia, algo cu varios otro artista tambe a laga sa.

Rey Barreto a duna di conoce cu e ta cana rond, hendenan ta cumind'e cu "Hola Rey", pero nan no ta molesti'e.

Herbie Hancock a keda nos isla pa varios dia cu su familia pa disfruta di un bon sosiego..

Omar Hakim, un di e drummerman mas renombra na mundo a declara na DIARIO cu e nunca por a kere cu tin hende asina agradabel manera na Aruba y cu "I have to return".

Nestor Torres a expresa na DIARIO con feliz el a sinti'e ta cana rond den e festival, paden y pafo varios anochi, y tur caminda el a wordo saluda, otro a dune man, pero sin cu ningun momento e acercamiento por a bira fastioso. "Bisa bo hendenan pa no laga e calor y gracia Arubano bay perdi. Boso tin un tesoro den esey" el a expresa na DIARIO.